

per persunas d'instrucziun, mainascolas e cussegls da scola



Nr. 3 2019/20

Part generala

Barat davart il rom individualisaziun

L'inspecturat da scola organisescha e coordinescha cun tut las persunas d'instrucziun pertutgadas dal stgalim secundar I e lur direcziuns da scola en mintga district in barat professional tar il tema "Instrucziun durant il temps a disposiziun per l'individualisaziun".

Da l'entschatta favrer enfin mez mars 2020 visitan las inspecturas ed ils inspecturs da scola en tut las scolas dal stgalim secundar I il rom individualisaziun. Davantvart stat buc la validaziun mabain l'observaziun da situaziuns en l'instrucziun ed ils discurs cun las persunas d'instrucziun responsablas. El medem mument vegnan aspects da l'instrucziun e da l'organisaziun approfondads cun ils/las mainascolas a chaschun da las sesidas da quartal.

Ils inspecturats regiunals resumeschan las enconuschientschas principalas ord ils discurs e las observaziuns durant l'instrucziun. En avrigl/matg 2020 organiseschan els in barat professional tranter persunas d'instrucziun, direcziuns da scola e l'inspecturat. La finamira è da far punts tranter ils pertutgads e da sa barattar en il senn da "ord la pratica per la pratica". L'occurrenza è facultativa e sa drizza a tut las persunas d'instrucziun che instrueschan il rom individualisaziun l'onn current u l'onn che vegn sco era a tut las direcziuns da scola dal stgalim secundar I.

Barat digital / barat da vacanzas

Movetia è ina agentura naziunala che promova projects da barat e mobilitad da lingua per las scolas. Tranter auter vegn sustegnì era il barat digital. Questa furma da barat è adattada fitg bain sco preparaziun per in inscunter real e per l'evaluaziun. Senza gronds sforzs pon las scolaras ed ils scolars communitgar ed emprender ensemen regularmain. Plinavant pon els approfondar uschè las cumpetenzas da

media dal Plan d'instrucziun 21 GR. Ils meds tecnics vegnan duvrads en buna moda per l'emprender. Ils scolars e las scolaras communitgeschan cun ina classa d'in 'altra regiun linguistica da la Svizra. Uschè emperdan els la lingua estra en situaziuns autenticas.

Sper il barat digital porscha Movetia cun il program "barat da vacanzas" a giuvenils tranter 11 e 16 onns la pussaivladad da viver ina u duas emnas en ina famiglia in 'altra regiun linguistica da la Svizra.

Movetia visita sin dumonda las scolas e preschenta la purschida als uffants e lur geniturs. Ils termins d'annunzia sun: 31 schaner, 30 avrigl e 31 avust 2020.

[Barat digital](#)



[Barat da vacanzas](#)



SwissSkills 2020

Suenter il grond success cun passa 60'000 participants en l'onn 2018 vain organisada l'occurrenza danovamain a Berna en settember dal 2020. Las giuvenilas ed ils giuvenils survegnan ina invista fascinanta en la gronda purschida professiunala en Svizra. Durant las mastranzas svizras da professiun dals 9 enfin ils 20 da settember 2020 pon ins vesair in ad in la lavur da circa 135 differentas professiuns. En 75 differentas professiuns vegn tschernì ina campiunessa u in campion svizzer.

Classas da scola profitan d'ina entrada gratuita sco era da pretschs reducids dals meds da transport publics vers Berna (max. 20 francs per persuna).

[Infurmaziun ed annunzia](#)



Sport per umans cun impediments

Special Olympics Switzerland maina ensemen cun "graubündenSPORT" dapi il 2017 en post regional da coordinaziun per persunas cun impediments. La finamira principala è da pussibilitar a persunas cun impediments la participaziun en las uniuns sportivas localas e porscher trenaments adattads. Oz existan gia trenaments specificis en differents sports. Ils posts regionals sun avisads sin cooperaziuns cun las scolas per pudair infurmar a las famiglias pertutgadas. La coordinatura regionala per il chantun Grischun, Elvira Hitz, s'allegra da pudair infurmar a famiglias pertutgadas: hitz@specialolympics.ch, 079 176 29 54.

[Infurmaziun e survista](#)



Swiss TecLadies

Studis demussan che bleras buobas na tschernan betg in mastergn en il sector tecnic o d'informatica, er sch'ellas han in talent correspondent. La finamira da Swiss TecLadies è da svegliar l'interess per las disciplinas MINT (matematica, informatica, natira, tecnica) tar ils giuvenils e da promover spezialmain buobas cun duns technics e preparar ellas sin ina carriera en quest sector. Il project vegn sustegnì da la confederaziun. Ina part sa drizza a scolaras e scolars dal stgalim secundar I, in'otra part a scolaras dal stgalim secundar II. Il program cumenza en mars 2020. Dapli infurmaziuns areguard il project sco era formulars d'annunzia sa chattan sin l'internet.

[Infurmaziun ed annunzia](#)



Contracts generals per servetschs digitals

Contracts generals sun ina buna pussaivladad per scolas per obtegnair licenzas da software u servetschs online a cundiziuns unificadas ed onestas. Sco agentura spezialisada da la Confederaziun e'ls chantuns tracta l'agentura educa.ch cun firmas e porscha contracts generals per man da las scolas publicas.

[Contracts generals](#)



Curs swch 2020 a Zug

Dals 6 fin als 17 fanadur 2020 ha lieu a Zug il 129avel Campus interchantunal da stad da la swch.ch. Persunas d'instrucziun e personal pedagogic san tscherner curs da perfecziunament attractivs or d'ina purschida da 180 curs. A partir da subit san ils curs vegnir reservads online.

swch.ch



Medias ed informatica

En schaner 2020 è cumparì per la 5 e 6avla classa il med d'instrucziun "inform@21" en sursilvan, puter, vallader, ru-mantsch grischun e talian. A partir da subit pon ins ordinar il med tar la Chasa editura per meds d'instrucziun.

Las versiuns grischunas cumpiglian analog la versiun tudestga prospects e brochuras per ils scolars e las scolaras. En las proximas emnas vegnan publicgads online en tut las

linguas d'instrucziun vinavant ils fegls da lavur per ils scolars e las scolaras sin la pagina d'internet correspondent.

[Chasa editura](#)



[Fegls da lavur](#)



Perfecziunament medias ed informatica da l'inspecturat da scola

L'inspecturat da scola ha sa perfecziunà dacurt durant trais dis cun il diever e las consequenzas da la digitalisaziun en scola. Ina da las finamiras impurtantas è da pudair cussegljar e sustegnair cumpetentmain las scolas publicas sin il champ da medias ed informatica. Il curs e vegnì manà da prof. dr. Werner Hartmann, che vala sco in dals gronds experts sin il sector dad ICT en scola. El ha publicgà tranter auter las impurtantas publicaziuns "Digitale Kompetenz" e "Informatikunterricht planen und durchführen". En il center da la furmaziun èn stads las schanzas ed ils risicos da la digitalisaziun, ambiants d'emprender digitals che s'orienteschan a las cumpetenzas, ina invista en l'infrastructura dad ICT dad ina scola moderna sco era intginas provas da programmar. In rapport detaglià sa chatta en l'ediziun dal mais favrer dal fegl da scola dal Grischun.

Cun amiaivels salids

Andrea Caviezel, manader inspecturat da scola

Part regionala

Termins

Giudicament d'admissiun 2020

Decisiun d'assegnaziun definitiva: 17 avrigl 2020
Scolas che cumenzan las vacanzas als 20 d'avrigl 2020 duain communitgar l'assegnaziun als 15 d'avrigl 2020.

Examen d'admissiun: 26 / 27 matg 2020

Occurrenza da barat "individualisaziun"

Tusaun u/e Cuira, 8 avrigl 2020, 14:00-16:00
Las persunas d'instrucziun pertutgadas survegnan al cumenzament d'avrigl in invit da l'inspecturat.

Occurrenza d'infurmaziun per autoritads da scola

Razén, scola, 27 matg 2020, 19:00-21:00
Tut ils presidis da scola sco era cussegls e cusseglieras da scola interessads sun envidads cordialmain a l'occurrenza. Ils cussegls da scola survegnan in invit cun program a temp.

Congedi da perfecziunament

Persunas d'instrucziun dal Grischun han il dretg dad obtegnair ina giada in congedi da perfecziunament da maximalmain trais mais. Quai è ina schanza unica per bandunar il trot da mintgadi, per reponderar la situaziun

persunala e per rinforzar e sa perfecziunar persunalmain e professiunalmain. La purschida da scolaziun da la scola auta da pedagogia Son Gagl sa drizza sin questa tematica. Las experientschas da questa scolaziun mussan che il barat cun collegas e l'occupaziun cun temas actuals vegnan stimads fitg. Savens profita er la scola da las intimaziuns or da la pratica che collegas mainan enavos. Mintg'onn han lieu dus curs che san er vegnir adattads individualmain.

[Perfecziunament persunal](#)



Salids cordials

Team d'inspecturat Plessur-Grischun Central cun Christina Nigg (manadra), Daniela Zanelli, Jachen Andri Buchli, Philipp Hugentobler ed Elisabeth Caluori (secretariat)

